

[Augsburg], 14. Oktober [1579]

An Joachim Camerarius d. J.

UB Erlangen, Briefslg. Trew, Wolf, Hieronymus, Nr. 9.

S. Vitam patris tui abs te designatam, Clariss[ime] vir, D[omine] et amice colende, accuratius legendi ocium nondum fuit. Sed quantum è paucis versibus animaduertere potui: idem de tuo scripto dicendum videtur, quod Cicero de Caesaris commentarijs scripsit: eum ineptis reliquise materiam: sed homines prudentes ab eodem argumento tractando deterruisse. Ego certè sine ullo ἀκκισμῷ, sed ex conscientia imbecillitatis in hoc genere meae, vix ac ne vix quidem admouere manum tanto operi audebo. Heri quidem à D. Cratone, qui se in ocium recepisse fertur, petij, ut is eum capere laborem non deditnaretur. Qui qua est ingenij celeritate et eloquentia: paucis diebus plus praestiterit, quam ego toto mense. Andreas Christophorus Iulius autem censem, Iacobum Morauium id munus et libenter et praeclarè obitum esse. Ego valde mihi diffido: et tam non audeo conari, quam efficere et cupio et debeo: si quis tamen quicquam debet, quod praestare nequit. Scis illud Metrodori nescio cuius: αὐξανομένῳ τῷ σώματι συναύξονται καὶ οἱ φρένες: μαραίνομένῳ δὲ συμμαραίνονται: quod in me verissimum esse comperio: adeò ut ne scholasticas quidem operas meas praestare possim sine diligenti praemeditatione. Sed haec hactenus.

Annotata ad Suidam tardè et accuratè scribas oportet. Nam ταχυγραφία nostra typographicas mendas gignit inumeras: id quod meo malo saepius sum expertus. Ea porrò ad me mitti peruelim: et statim post datas tabellario literas, id me non ascripsisse paenituit. Ego antehac omnia Harpocrationis, Suidae addidi: nonnulla etiam è Stephano adieci: quem totum Latino Suidae (quod quidem ad historica attinet. Nam τὰ λεκτικὰ ad Lexica pertinent) coniungere decreui: si vita et valetudo suppetet. Omnis homo bulla: maximè valetudinarius senex. Sed operam dabo, ut, quamuis non imperator, stans, hoc est, non ingnauus, moriar.

Commentarios in α' Ἰλιάδος habeo, eruditissimum opus. εἰς τὸ β' habui, sed recuperare nunquam hactenus potui: ut et alia complura doctissima et elegantissima patris tui opera: quae utinam me viuo σωματοποιηθέτα edantur. Vale. 14 VIIbris.

Hiero[nymus] Wolfius
Tuus.